

TRIBUNA POLITICA

La revisiun parziala da lescha da polizia

DA CHRISTIAN RATHGEB,
CUSSEGLIER GUVERNATIV

La sessiun d'avust vegninta vegn il cussegl grond a tractar la revisiun parziala da la lescha da polizia. La lescha da polizia ch'è entrada en vigur il 1. da schaner 2005 è sa cumprovada en la pratica. Per via da quai na sto ella betg vegnir revedida cumpletta-main.

Ma differentas intervenziuns parlamentaras, las experientschas fatgas dapi l'entrada en vigur dal cudesch da procedura penala svizzer ils 5 d'october 2007 (CPP; CS 312.0) e las enconuschientschas gudagnadas dal rapport da polizia 2015 plus pretendan che la lescha da polizia vegnia adattada.

Tenor la constituziun chantunala (art. 79 CC) garanteschon il chantun e las vischnancas cuminaivlamain la segirezza e l'urden public; quai è ina incumbensa centrala dal stadi. Ma igl è chausa dal chantun da fixar las cumpetenzas correspudentas.

Per quest intent vegnan enumeradas tut las incumbensas da la polizia chantunala en la lescha da polizia vertenta. Ina regulaziun cumparegliabla per las vischnancas manca.

Percunter fixava la lescha communalala tge incumbensas polizialas che las vischnancas ston ademplir. Cun la revisiun totala da la lescha da vischnancas l'onn 2017 ha quella survegnì ina nova orientaziun.

La lescha da vischnancas na prescriba betg pli



tge incumbensas ch'ina vischnanca sto ademplir e tgeninas ch'ella na sto betg ademplir. Las incumbensas che ston vegnir ademplidas ston ussa vegnir fixadas en ils relaschs sectorials specifics dal chantun.

Questa nova orientaziun ha già consequenzas per la lescha da polizia. Las incumbensas polizialas che las vischnancas ston ademplir, ston vegnir circumscriittas da nov en la lescha da polizia. Da questa circumstanza vegni profità per sclerir la cunfinaziun tranter las incumbensas polizialas chantunalas e communalas. Quai na vul però betg dir che las vischnancas survegnan incumbensas polizialas supplementaras.

Ellas duain dentant vegnir autorisadas da nov da fermar persunas per procurar per quietezza, urden e segirezza. Las ulteriuras mesiras polizialas ch'èn regladas en la lescha da polizia e las mesiras repressivas che stattan a disposiziun per realisar talas, sco la constataziun da l'identitad u la retensiun d'ina persuna, restan vinavant resalvadas a la polizia chantunala.

Ultra da quai duai vegnir stgaffida ina basa

legala che regla tgi che surpiglia ils custs da las incumbensas da las polizias communalas che vegnan ademplidas da la polizia chantunala.

Ina tala regulaziun dals custs è en mes eglis indispensabla, perquai ch'ella garantescha che tut las vischnancas vegnan tractadas en moda eguala, saja ch'ellas han in contract cun la polizia chantunala, saja ch'ellas han in atgna polizia communalala u saja ch'ellas dovran ad hoc il sustegn da la polizia chantunala.

Per motivs da la fairness pari a mai ed er a la regenza che questa regulaziun saja justifitgada.

Plinavant duai vegnir stgaffida ina basa legala per pudair equipar la polizia chantunala cun apparats da registraziun e da transmissiun audiovisuals mobils.

En il center stattan actualmain meds da surveglianza mobils, sco per exempel dronas sco er apparats per registrar maletgs e tuns che vegnan purtads vi dal corp, uschenumnadas bodycams.

Dronas faciliteschan la lavur da la polizia; ellas gidan p.ex. a sclerir ina situaziun en ina cuntrada topograficamain difficila, senza metter en privel las forzas d'acziun.

Er bodycams duain facilitar la lavur da la polizia. Da quellas m'empermet jau in effect preventiv e deescalant e tras quai ina megla protecziun da las polizistas e dals polizists cunter violenza.